



遵

諭詳議科場事宜疏

康熙三十九年八月

奏爲欽奉

上諭事康熙三十九年八月二十日內閣揀選辦事

中書安泰賚到大學士欽奉

上諭一摺內開康熙三十九年七月二十四日大學

士伊桑阿馬奇王熙吳璣熊賜履張英學士滿

都邵穆布巢可託舒輅顧祖榮奉

上諭直隸巡撫李光地河道總督張鵬翮湖廣總督

郭琇廣西巡撫彭鵬此四人處著將該部院揀選
筆帖式各遣一員限期前往將郭琇條陳學道事
務鄭惟孜條陳鄉試之處經九卿會議事宜及禮
部議覆滿普條奏科場事件俱全抄賫往令看九
卿禮部所議者得其當否若何施行方得無弊永
遠稱善著各殫心詳議務期歸於盡善卽具本付
遣去人員賫回啓奏伊等皆居官素好行已清廉
之人此事若瞻徇諸臣情面不務求盡善殫竭乃
心從公議奏則伊等一生讀書制行俱有忝矣往
返直隸限六日江南限一月湖廣限五十日廣西
限七十日欽此欽遵臣伏惟歲考科考爲童蒙始
進之階鄉闈會闈乃士子初發之軀立品先端
於始致身必視其初若始以財求而初以賄進
賄進之途無品財求之竇失身非徒
國體攸關實於

聖心有負所以督臣郭琇有試差積弊實甚之疏科

臣慕琛有

聖意作人甚盛廷臣持議未精之疏臺臣鄭惟孜有
條陳監生鄉試在京回籍利害之疏科臣滿普
又有請除鄉試三弊之疏則知已無不言言無
不盡矣我

皇上日月同照雨露均施皆下其議於九卿詹事科
道督臣一疏會議甫上奉

旨傳進滿漢大學士學士

上諭考試事甚爲緊要郭琇條奏皆是不但考試秀
才有弊卽科舉會試亦不能無弊看邇來數次考
試取中者大臣官員子弟居多貧寒之士取中者
甚少以致人皆騰怨若相沿日久使後世議論此
時科場不堪則及于朕矣嗣後科舉會試將現在
大臣官員子弟另編字號另入科試以人數多寡
各分定額數取中庶貧寒之士似可無怨爾等會
同九卿將郭琇條陳一併議奏欽此臣在外得見

邸抄爲天下萬世孤寒讀書種子向

闕九叩首今督臣科臣臺臣諸疏已經議覆具題
留中滿漢大學士學士鈔奉

上諭直隸巡撫李光地河道總督張鵬翮湖廣總督
郭琇廣西巡撫彭鵬此四人處著將該部院揀選
筆帖式各遣一員限期前往將郭琇條陳學道事
務鄭惟孜條陳鄉試之處經九卿會議事宜及禮
部議覆滿普條奏科場事件俱全抄賫往令看九
卿禮部所議者得其當否若何施行方得無弊永
遠稱善著各殫心詳議務期歸於盡善卽具本付
遣去人員賫回啓奏伊等皆居官素好行已清廉
之人此事若瞻徇諸臣情面不務求盡善殫竭乃
心從公議奏則伊等一生讀書制行俱有忝矣往
返直隸限六日江南限一月湖廣限五十日廣西
限七十日欽此臣跪讀

天語仰見釐剔栽培之

天心惟有詢岳闢門之誠并行千古夫以在廷臣工
集思廣益詢謀僉同我

皇上特諭大學士學士傳

諭臣光地臣鵬翮臣琇臣鵬四人各殫心詳議務期
永遠盡善又獎臣等以居官素好行已清廉又
動臣等以瞻徇情面則一生讀書制行有忝之
聖諭恍若

睿慮臣口囁嚅臣舌畏縮而導臣昌言使臣敢言臣
遭逢

堯舜臣忍不悉竭其愚竊以督撫與學臣相爲表裏
督撫之不樂有正大光明之學臣猶學臣之不
願有孤介恬淡之督撫然亦有迫至無奈勢處
其極棚定方准出巡帳賒弗容覲面避債無臺
逃形無地名實兩喪又不得不思及督撫無慾
而剛無私而戇者臣查學政全書內載學臣貪
贓許督撫 題叅革職提問督撫需索陋規許

科道據真糾叅照貪贓例至上司同僚京官鄉
宦私書及親族朋友隨往說情抽豐至州縣官
傳遞私書鄉紳投帖請酒者許督撫科道 題
叅有官者革職無官者交與刑部從重治罪

功今皇皇廷臣會議照定例處分是矣然使例之
果適督臣郭琇何所庸其激切今欲實圖永遠
無弊以臣之愚必將現行通弊積習一一臚列
如督撫每試每府之考棚定規若干藩臬司道

每府每試之例銀若干進學若干知府之要挾
包攬勢宦之干求京函之投托至於武生一途
盡行賄賣又有舉人進士之濡沫教官巡捕之
乞恩甚至書吏門皂廚夫水火夫之討賞濫觴
掃地皆督臣疏內所已陳者又督撫每案另有
謝考有開送生童姓名補廩保等入泮巧算取
盈而後飽於橐快於胸胸快任其貪饕橐飽聽
其飛食又府州縣官之強有力者亦各受金薦

入其怯懦者必將所取案首視地肥瘠半價致
餽方得錄榜自免貽羞而貪人敗類卽案首亦
問銅臭餽半得半又州縣官教官之婪者黠者
能爲毆魚之獺毆爵之鸛驅禽逐獸之鷹犬多
有効力酬勞分潤各名色又武臣大者有提鎮
駐防次者有督標撫標副叅遊之差等亦皆罔
利乘機恫疑恐喝爲學臣者吞聲迎順曲意奉
承又道房奸胥猾吏先期公住考試地方勾通

惡監劣庠巨蠹神棍評價如賈爭趨如市贓私
正銀外有拉絳過錢禮有內司經手禮而貴遊
勢僕之親密友接踵摩肩或借寓故舊年家或
聚宿菴堂寺觀道上招搖天平公允爲獺爲鸛
爲鷹犬者如惡劣蠹棍之類又有抽扣禮有盤
倌禮而坐席未安京債隨索逐程計日內外交
訖若未考而朦已考倒案暗添是之謂註名或
彼邦而混此邦夤緣占額是之謂冒籍甚有現

任官員幕賓眷屬皆得朦混於所任之府州縣
其他藉公文而非鋪遞托當道以爲郵人凡有
封函多屬要路苞苴是問鬼蜮橫行榜發詈詛
紛紛牌行逐辱洶洶顧影覈棘乞兵扶持醜態
罪狀罄竹難書而解冊之常例各衙門餽送之
書帕轉石不移萬一孤行獨立衆咻爲怪皆督
臣疏內所未盡者此備不知始自何時作自何
人但識金銀頓埋錦繡遂致文運與士氣沈淪

鬱抑臣痛心疾首久矣查康熙三十六年五月
內臣原任同官戶科掌印給事中臣劉蔭樞疏
稱學臣有自爲不肖者有逼之使爲不肖者比
學臣爲莊田督撫按地履畝而責其租比學臣
爲行商不肖知府恃提調之權網羅收拾盡吞
入已當路而制其死命餘瀝嘑爾此與督臣今
疏督撫以學臣爲壟斷知府擇價高而包攬上
行下效前後一轍憶臣先給事黃門省見前任

河南省學臣張潤民 都門刊刻誓詞有苟負
斯文身甘駢首妻子發尚陽堡爲奴詞氣激烈
比至而考棚未講進退維谷臣聞之每憐其志
之高心之苦而惜其膽之不壯然當此四顧亦
岌岌矣督臣郭琇請嚴督撫處分誠拔本塞源
之要道也顧所謂嚴者在定例內乎抑不在定
例內乎在定例內則比照貪贓久已 國法弁
髦不在定例內則倍甚貪贓又恐深文鍛鍊且

例亦何嘗行之一人行之一事也敢請

皇上赦既往過將來將督臣疏內所已陳與臣補督
臣疏內所未盡縷析條分犯某事者毋赦干某
條者不宥

御製榜文震若雷電褫魄落膽每一學臣入境省會
郡邑刷呈

聖訓榜文一道肅香案設廠在五達之衢督撫至廠
學臣恭捧立宣朗聲震悚自督撫以下文武跪

聽起相戒勉督撫恭粘牌懸於堂之上門以外
發掛學臣之門一堂一藩臬司道之門一堂一
提調府州縣門一堂一各學宮門一堂一咨送
提鎮之門與堂頒發各府州縣各二十道掛於
門張掛於當路仍飭藩臬司道出具不敢需索
例銀開送進學印甘結府州縣印官該學教官
各具不敢線索過錢不敢扶同廩劣受財竄籍
等弊印記甘結知府出具不敢包攬要挾縱容

奸猾惡劣棍蠹遊客宦奴在外招搖等弊印甘
結學臣自具無文武童賄賣無督撫考棚陋規
無藩臬司道常規無聽徇京卿勢要親朋故舊
私函囑托無倒案註冊等弊印甘結歷一府後
繳結申督撫督撫臣自具并無考棚謝考開送
生童姓名勒索巧取等弊具疏 題明恭呈

御覽各結不以實罪以失察自結不以實罪以貪婪
貪婪督撫罪加等學臣遇挾制干請者准徑實

封奏 聞臣知

皇上日理萬幾必不以章奏爲瀆其出巡謁

至聖先師廟畢於未講書時明倫堂設香案知府
立宣朗聲震悚學臣暨同城文武大小各員跪
聽試日點名畢送考各官入學臣自設香案自
立宣各官偕與試生童咸跪聽嵩呼

聖明再請

御製榜文內凡文官武職爲子弟鑽營富戶豪商爲
兒孫行賄除本童責革外祖父兄弟有官者實
行革職無官者實行從重治罪實首者贓銀給
賞廩生保竄籍者扑責追贓人之愛已身必倍
於愛子弟人之愛性命必重於愛功名今則臨
之以

天威悚之以刑罰惕之以禍患知畏知懼書載制官
刑儆于有位具訓於蒙士示提撕也周禮狗以
木鐸曰不用法者國有常刑與適人以木鐸狗

于路示公聽也詩曰匪面命之言提其耳是之
謂夫若藏之 令甲例亦空談卽勒於貞珉石
不能語而欲挽回習弊洗濯狀態則萬萬不行
之勢或謂定例簡明臣言瑣細當亦難逃

睿照中矣若督臣原疏有州縣送府名數與知府送
道名數應照定額不得勒措以爲要挾不得濫
取以滋弊竇等語臣竊以府案不得勒措是矣
而府額送道照定額一倍二倍必如河臣張鵬

翮先任山東兗州府考校儒童謝絕一切三覆
拔尤而後可匪是則不肖知府按倍收錄止求
文理平通掩飾耳目府童非錢神則勢力孤寒
向隅而哭垂橐而求數者必相因且文章才識
不同而鑒衡眼力各別與其限數而有遺珠何
似廣收而免抱璞至於府取荒謬不通故意朦
混應准學臣將原卷申報照督臣所 題核叅
但此法行而縣府道試卷必三連筆跡對驗乃

無弊又督臣疏稱武庠盡行賄賣市恩給賞緣
武生不經磨勘等語臣竊以磨勘者奇貨可居
之謂也多一磨勘卽多一規例規例到視解卷
如贅瘤規例不到藉吹瘢爲恐嚇而况原卷本
來早已改換循名無實先是吏部等衙門議覆
停止解卷遵行在案今會議將督臣所題武
童不行磨勘之處無容議正與詳議永遠無弊
之

旨相符臣此議雖與原疏稍殊臣寸心實與督臣不
二其湖廣各學有棍徒插入曰附學有物故改
售曰鬼接頭有改學承頂曰飛過海推之各省
保無此弊 廷議比照貪贓例光棍例無容臣
贅此臣欽遵

上傳將督臣郭琇條陳學道事務及九卿會議抄摺
殫心詳議稍獻芻蕘者一

京師萬國所觀瞻也 國學多士所彙聚也臺臣

先爲備陳監生鄉試在京在籍之利害一疏九
卿詹事科道會議屢以成均空虛爲慮宜矣然
稽古盛時有國學有鄉學鄉學之載諸禮記家
有塾黨有庠術有序是也鄉學之攷於孟子夏
曰校殷曰序周曰庠是也宋時嵩陽岳麓白鹿
洞睢陽四書院賜額賜書隨地可行

今天下大一統矣東漸西被朔南暨聲教訖於四
海譽髦斯士安在遙集成均始彰其盛而况成

均首在興行重在作人非爲獵取一科僥倖成
名而設臺臣疏稱順天爲監生作弊萃藪作弊
惟同鄉爲甚亦惟先時相聚而謀爲甚得則人
人操必中之術不得則怨謗讎敵甚或糾合黨
羽嚇詐報復請令回籍痛切言之矣夫此監生
率皆俛仰於其鄉人之貴且能者當其始也相
附相親屈膝厚顏而奉爲師及其旣也相嫉相
謗彎弓反刃而視如仇此無他得失之念急而

廉恥之道衰也周制不率教者屏之遠方西方
曰棘東方曰寄終身不齒此類是也今使回籍
肄業仍與本省鄉試未嘗屏斥則凡有志者歸
尚恬退慎廉隅他日出爲廉吏爲純臣處不失
爲真儒爲莊士亦或由此攷宋時有三舍自外
舍而升內舍自內舍而升上舍循序積漸而考
其成今坐監特其名耳當鄉試之期猝然而至
榜後鬩然散矣又有甫至息肩本省典差串通

已定星飛電逐仍馳而南臺臣亦痛切言之矣
臣查順天鄉試中額南皿北皿額共五十七名
南北皿卽南北之監生也遠不具論近科丙子
南皿中式二十七名內江南一十七名浙江七
名江西福建雲南各一名北皿直隸三十名山
東山西各一名河南二名而他省不預焉己卯
南皿中式二十九名內江南十七名浙江七名
江西四名福建一名北皿直隸三十名山東六

名陝西一名河南二名而他省又不預焉卽此可知太學監生無甚係於十五國之人材也明矣臣常聞南音而假北人南籍而冒北貫屢經覺發恬無羞惡不過奔競圓熟駕彼輕車趨茲捷徑成均豈以斯爲有無辟雍豈藉是爲輕重哉以臣之愚敢請

皇上乾斷將南北皿中額五十七名以二十名收三輔讀書成均之才號編京字以三十名收文武

官員子弟之才號編官字以七名合之滿洲蒙古漢軍原額共三十七名號編滿合字官字號若干民字號若干收滿洲蒙古漢軍之才各額另號兩無妨各省監生應如臺臣所請速遣言歸永杜夤緣迴瀾砥柱若夫成均重地祭酒司業少變通有虞典樂之教在京卿大夫子弟濟濟咸至春夏秋冬講習以序經義治事考課有程又如周禮大司樂掌成均之法以教國子弟

漢時貴戚小侯皆入學唐時設國子學以處皇屬貴胄此風近古查康熙三十六年九月宗人府禮部奉有八旗宗室子弟能力學屬文奮志科目應令與滿洲一體應試編號取中之

上諭臣仰承

聖意請於八旗官學外添設如漢唐皇屬貴戚樹之培之蔚爲楨榦三輔貢監與舉人情願就監讀書者擇其有行有文拔爲師長爲教習督學院

亦拔其有文有行廩增附造冊送太學切磋觀摩此卽變通周禮教國子弟意也北方尚質較諸佻健浮誇相去遠矣舍此弗講而徒以文教無人太學空虛爲慮臣見甲子順天考官革職癸酉休致已卯安插奉天紛紛洶洶孽雖自作然甚爲國體惜也此臣欽遵

上傳將臺臣鄭惟孜條陳鄉試之處及九卿會議抄摺殫心詳議稍獻芻蕘者二典試簡主司分闈

擇同考臨場防換卷皆所以襄

國家文治之隆爲賓興得人之慶者也科臣恐寒素進取維艱主考必推任重行端學優之員臣竊以行端則無私無私則公公能生明任與學其次也敢請我

皇上甄拔廷臣人淡而骨鯁者登斯選人不淡則濁濁則不能克已骨不鯁則柔柔則必至因人周書曰人之有猷有爲有守使羞其行而邦其昌

則行端尚矣臣嘗見京官放縱敗檢侈靡無度者以之臨民民脂竭以之取士士命坑行端豈不急哉京闈分考科臣恐專用直隸知縣易於鑽營請於部院州縣官員內進士舉人出身者多行揀選開列具題部議以滿漢進士舉人出身之員外主事中書行人評事博士內閣中書國子監助教及直隸所屬同知知州知縣與守部進士開列具題臣竊以進士舉人同

一科甲同一守部者也盡數開列恭候

欽點人多而甲乙未定地遠而嫌疑不生則營謀絕矣滿洲蒙古漢軍中授業傳經多漢人是師科臣恐領卷入號師徒更換請將所坐號房四面封固巡察伏查康熙三十二年四月奉

旨八旗號房著與漢人分別編號欽遵在案科臣今請巡察封固誠爲加謹臣竊以換卷多在入門暗約之會檢查必於出號交卷之時另設滿合

收卷官一員出號交卷定限十人一班巡緝官送至收卷所互相識認按卷查號則更換消阻矣踰墻必於所編號房南北各空兩行高立瞭望軍於四角穿墉窮而鳴崗自出其找尋代做等弊會議處分照例無容臣贅此臣欽奉

上傳將部覆科臣滿普條奏科場事件殫心詳議稍獻芻蕘者三再查部臣抄摺到臣有工科給事中慕琛一疏奉

旨九卿詹事科道一併會議具奏欽此欽遵今臣伏
讀大學士學士欽傳未見

上諭令看九卿會議科臣慕琛原疏臣回
奏敬慎伏惟

皇上因科歲試而念及鄉會闈因大臣子弟而念及
孤寒

特頒嗣後科舉會試將現在大臣官員子弟另編
字號另入考試以人數多寡各分定額數取中

之

諭旨廷臣會議嗣後八旗直隸各省現在文武大臣
以下京官文官以七品有職掌官武官佐領等
官以上外官知縣守備等官以上官員同胞兄
弟子孫及同胞兄弟之子科舉滿洲蒙古漢軍
滿合字號之下直隸皿貝字號之下再各省卷
面上俱編官字字號另入號房考取三場完畢
酌量於卷子多寡照額分派取中如民卷以百

卷取五卷則官卷二十卷取一卷其餘卷零數過半者仍取一卷不足一半者不取卷數多者照此算取其官字號不必分經則文學寒士俱得邀

皇恩於無窮矣 題覆未奉

旨臣竊以各省仕宦多寡不齊所見貴州現在仕籍文職內外不過一十一人廣西現在仕籍文職內外不過一十四人閩廣滇蜀可知矣江南浙

江等處多至十數倍此不齊之大凡也又閩廣山陝武臣居多較之他省又數十倍此又不齊之大凡也若與民卷較數則不足者每科無子弟入彀之思而有餘者每科占孤寒登進之路臣恭釋

上諭另編字號是字號與民卷別也另入考試是考試與民卷別也各分定額取中是中額又與民卷別也

上諭有另字各字之分廷臣無另字各字之議臣所
以有各額另號之請重 京師也隆 豐沛也
恩下逮而勵大臣修庭訓也我

皇上加意破格或於江浙本省試額量增幾名不必
另編號聚訟自息再於滿合中臣擬順天剩額
七名外乞增五名以三十名屬官號以十二名
屬民號官民子弟均戴 恩自

上出命而不言則有咎再查廷臣所議者在京文官
自七品以上武官自佐領以上在外交官自知
縣以上武官自守備以上之子弟似與

上諭大臣官員子弟未合科臣所奏者在內滿漢文
武三品以上之子弟在外督撫藩臬之子弟似
與

上諭大臣官員子弟相符而提鎮子弟未嘗疏及臣
請內外交武官子弟入試俱照現在四品以上
已故者子弟不必編號自四品以下子弟照舊

赴直省鄉試其翰林科道小九卿吏禮二部司
官應否一體非臣敢議又科臣疏內有請照

朝考漢軍例

皇上親試遣親信內大臣監試等語夫內大臣旣稱
親信矣可監試獨不可主試乎所當另設考場
使嚴師無從代筆良友不得捉刀賢路肅清風
俗於變光四表格上下文思比唐惟

上諭伸孤寒之氣又編號錫嘉名以官

帝簡總裁

欽遴同考知良父兄之善教有佳子弟之能文期仍

三朝夜以繼日文章付諸公閱去取恭聽

睿裁如何混珠尚猶贖貨自求禍也必明罰之仍請

鄉會闈榜示自

天依然歲科試

敕訓如電宣讀主司立捧張掛諸色施行非藉

乾剛終難賁吉臣所以敢請

御製近援

欽頒臺省之箴臣所以必欲耳提遠師木鐸徇路之
法庶幾薄海咸知

聖主愛士至誠并使萬年長頌

元后求賢篤實內閣中書臣安泰至臣抱疴兩月殘
喘一絲喜千秋斯文之光荷萬里

清問之寵焚香盥手擗管叩頭弗徇情面臣之心

昭垂永遠

上之德起居載注微賤沾榮再惟褒獎

溫綸敢不對揚

休命貼黃難罄抒丹悠長伏乞

皇上睿照俯賜全覽施行爲此具本欽遵

上諭謹付中書臣安泰賚回奏

聞

降級開復疏

康熙三十九年十二月

題爲降十二級免調特留疊荷

高厚逾三年餘自內歷外無補涓埃遵例陳明捫心
惶愧事臣草芥寒微遭逢

堯舜特達殊知自臣宰順天府通州三河縣始臣任
內於康熙二十五年六月因監犯孔應舉脫逃
限滿未獲吏部一本爲報明事照例議降一級
調用二十六年十月二十八日欽奉

特旨彭鵬著降一級從寬留任欽此是時宰洵未及
三年首荷

聖恩之異數也又康熙二十四年十月因鑲白旗下
庄頭宋科至縣屬葦子庄被刦限滿未獲吏部
一本爲欽奉

上諭事照例降一級調用二十七年九月二十九日
欽奉

特旨彭鵬著降一級從寬留任欽此是時

賜金卽在十月再蒙

聖恩之異數也又康熙二十四年十一月因鑲黃旗
下庄頭戚維麒至縣屬寨里庄被刦限滿未獲
吏部一本爲欽奉

上諭事照例降一級調用二十七年十一月初二日
欽奉

特旨彭鵬著降一級從寬免調用又康熙二十四年
十一月因正白旗下庄頭高應魁至縣屬柳河

屯被刦限滿未獲吏部一本爲欽奉

上諭事照例降一級調用二十七年十一月初七日
欽奉

特旨彭鵬著降一級從寬免調用又康熙二十四年
十一月因縣屬小屯庄正白旗下投充人張存
仁家被刦限滿未獲吏部一本爲欽奉

上諭事照例降一級調用二十七年十一月十二日
欽奉

特旨彭鵬著降一級從寬免調用臣前疏所稱十日
之間三邀

溫旨是也又康熙二十五年閏四月因縣屬蔣富山
民段自明家被刦限滿未獲吏部一本爲欽奉
上諭事照例降一級調用二十八年六月十七日欽
奉

特旨彭鵬從寬免調用著降一級留任又康熙二十
五年八月因縣屬蔣家庄正白旗庄頭郭一位

卽郭一威家被刦又因金吾衛民宛銀行至縣屬茨河地方被刦限滿未獲吏部一本爲欽奉上諭事照例每案各降一級調用二十八年八月二十一日欽奉

特旨彭鵬著降二級從寬免調用臣前疏所稱或一案兩見均荷

容留或兩案并題亦叨

寬免是也又康熙二十七年九月因縣屬民田自亮子割草被殺並無指實兇犯案緝未報經順天府撫拾列叅吏部一本爲糾叅溺職屬員等事照例革職二十八年十月初九日欽奉

特旨彭鵬從寬免革職著降二級留任臣前疏所稱或不幸而罹於過

天地含弘或無故而陷於辜

日月洞照是也又康熙二十六年正月因縣屬田各庄旗人唐大家失盜限滿未獲吏部一本爲欽

奉

上諭事照例降一級調用二十九年二月二十七日
欽奉

特旨彭鵬著降一級從寬免調用又康熙二十六年
三月因豐潤縣正藍旗下人房耀等行至縣屬
段家嶺被刦限滿未獲吏部一本爲欽奉

上諭事照例降一級調用二十九年三月二十日欽
奉

特旨彭鵬著降一級從寬免調用臣前疏所稱旬月
之內重沐

殊恩是也巳上三河縣任內降一十二級免調留任
出自

聖明康熙三十一年五月欽奉

特旨彭鵬著補授工科給事中欽此欽遵所有原任
降級並無奉有隨帶新任之

旨臣於康熙三十二年三月內遵

旨爲指名具奏事疏內聲明奉

旨這本內事情著總河于成龍察審具奏彭鵬條陳
公事將已身降級之處附奏不合著飭行該部知
道欽此欽遵亦無奉有仍帶降級之

旨比奉

特簡貴州提刑按察使司按察使部咨貴州撫臣有
原任降十三級仍帶新任等因比奉

特簡廣西巡撫吏部題明兼銜仍有原任紀錄一次
降十三級留任應帶新任等因奉

旨彭鵬陞爲都察院右僉都御史巡撫廣西等處地
方提督軍務餘依議欽遵行咨在案臣查定例內
外降級留任官員三年無過方准題請開復督
撫令其自行陳奏臣自康熙三十一年十二月

初十日到工科給事中任扣至三十三年閏五
月初七日離任連閏歷俸一年五個月零二十
八日康熙三十六年五月二十日到刑科給事

中任扣至三十七年三月二十六日離任歷俸
十個月零七日康熙三十八年二月二十五日
赴貴州按察使任扣至本年五月二十六日離
任歷俸三個月零二日康熙三十八年九月十
七日赴今廣西巡撫任扣至三十九年十二月
二十日止歷俸一年三個月零四日前後四任
連閏歷俸三年十個月零十一日伏惟歷三年
復還原級

皇上待下深仁將四載未具

題明微臣反躬滋愧顧內外皆准開復定例昭垂
而督撫得自奏陳

聖恩廣大臣不請則違現行之例臣不題則過

浩蕩之恩仍將降級緣由備敘留任節次受

恩頻躋其極援例尚敢至斯者由我

皇上生成施諸無已祇覺臣一身戴履報莫名言再

查康熙二十五年九月臣三河縣任內有拿解

逃人閻得亮併解伊弟窩家旗人閻得明部議
違例降一級所以部臣有降十三級之案合併
聲明伏乞

皇上慈照敕部議覆施行爲此具本謹題請

旨

題禁南太兩郡土童冒籍疏

康熙四十年二月

題爲粵西南太兩郡假名土童冒籍請定讀書報
名儒學之法并援順天勒限回籍之仁以廣

聖恩事伏惟冒籍之禁現行事例倍嚴臣聞從前他
省人氏竄粵實繁有徒已卯鄉試臨場點名衆
攻闕然本省應試生員忿而歸深夜分道招而
入殊玷賓興然他省冒一鶚薦之徒則本省少
一鹿鳴之選天末孤寒呼籲宜矣且此竄籍者

者挾一必售之技既冒秋闈得赴春闈以西粵
額定進士只一名彼冒籍而竄舉人卽冒籍而
竄進士天末孤寒呼籲又宜矣是在地方印官
及保結廩生之絕情面拒賄賂學臣之慎廉隅
端本澄源先於欽奉

上諭事

欽差內閣中書安泰馳驛到西粵臣謹接部抄跪讀
上諭抒臣之愚殫心議奏內有湖廣督臣郭琇

題爲試差積弊等事疏內所未盡者若未考而朦
已考倒案暗添是之謂註名或彼邦而混此邦
夤緣占額是之謂冒籍此臣通指直省而言甚
而現在官員幕賓眷屬得朦朧於所仕之府州
縣此臣專指粵黔從前而言近奉部覆通行知
照皆覆內所未及者今據粵西舉貢生員呈稱
因幕賓而朋類尤多由眷屬而子弟咸在其於
夤緣情形毫無餘蘊臣申飭示禁外查訪粵西

土司地方土童應童子科例得撥學思明土府
雖有學原無土童撥入泗城土府雖有學土官
禁絕其頭日子弟不容讀書亦無土童與考惟
南寧府屬之歸德州忠州遷隆峒果化州下雷
州湖潤寨太平府屬之太平州萬承州江州安
平州羅陽縣羅白縣等處從土司報名與試卽
名土童或土司之主文或土司之西席鑽營土
官一印結徑送府道收考入泮沿習日久卽土
司主文西席之子姪眷屬但求與土官識面者
請土官出一印結亦得收考上下相蒙利其賄
也凡冒土童得青其衿而領粵西鄉薦者比比
也請

敕定嚴例凡土官土目弟男子姪能應土童試令其
先送附近各儒學讀書驗其鄉音果非他籍人
報名本府乃准試如未經報名讀書驗音者卽
有土官印結槩不許收仍罪保廩如此則土童

之鑽營絕而他籍之夤緣消矣其土日子弟有志誦讀土官禁遏與試將土官嚴加處分俾得奮與敦詩書而明禮義亦化俗移風之大權也至於從前冒籍進學生員中式舉人多與入籍二十年之例不符直窮到底恐不肖官吏視為奇貨受賄反代朦朧無財必致刻畫紛紛滋擾臣查在

京冒籍舉人部覆臺臣鄭惟孜條奏行令部文到日爲始限兩月內准其具呈自首禮部查明改歸原籍肄業出結等官亦於兩個月內檢舉等因奉

旨依議查部覆直隸巡撫李光地疏爲敬陳頂冒行查之弊仰祈

睿鑒事部覆順天冒籍生員顧寧緯等旣經該撫據呈檢舉冊報應准其改歸原籍肄業行令伊等原籍地方查明註冊報部等因奉

旨依議欽此通行各省一體遵行在案敢請照例勒
限改回原籍粵西烟瘴之地官茲土者升沉無
常出結官員寬免處分至於本省異府異縣冒
籍者開賄賂之門遠方尤甚常有本州縣而大
半他州他縣撥入者臣於粵於黔所見畧同如
曰乏才則

功令內載乏才地方卽取一二名亦可豈必楚才晉
用而况維楚之未必勝於晉也今奉通行嚴禁
違者許儒童出首審實將學臣從重治罪載諸
律此法行則讀書種子不至斷絕臣仰體培植
人才之

聖心爲此鯁鯁伏乞

皇上特恩施行臣未敢擅便爲此具本謹題請

旨

卷之三

